

1622 89 80

no. 2

LE SAVLT de l'Allemand.

*Aux esprits curieux qui entendent le
jard de la Cour.*

16

M. DC. XXIII.

Case

F

39

326

1623 52

LE SAVLT

de l'Allemand.

AV ROY,

SIRE,

Puisque vostre Majesté veut & a dit dès son enfance à la Royne sa mere, que vouliez estre appelé LOVYS LE IUSTE, il faut donc pour paruenir à tiltre si glorieux & louïable, en faire les actions, & viure & gouverner vostre Estat, en sorte que iamais ce nom ne vous soit changé, & qu'à l'imitation de voz mœurs, voz successeurs prennent exemple, & que pour que faciez reüssir vn si bon dessein, il faut & est nécessaire, tant pour la conseruation de ce Nom, que pour le maintiē de vostre Royaume, y faire vne Reformation générale; de peur aussi qu'au lieu de ce Nom de Louys le Iuste, vous soyez appelé Louys le Simple, & soyez depossédé de vostre Royaume, duquel ne serez iamais asséuré

A ij

que les Huguenots & Rochelois principalement ne soient entièrement despoüillez de toutes leurs fortifications, Assemblées, conférences & armes; Car si ne vous rendez maistre de leurs villes, vous n'estes point Roy, & ne déues qu'attendre l'heure qu'ils vous couperôt la gorge, & au plus de Catholiques qu'ils pourront, & surprendront de meilleures villes avec la Rochelle, & autres villes qu'ils ont: Ils feront descendre le Prince de Galles ou quelque Prince ou Seigneur François qui Couronneront pour leur Roy, pour vous chasser & voz successeurs de vostre Royaume; tellement que puisque auez si bien commencé, & que Dieu visiblement conduict vos desseins, si n'acheuez le reste, vous leurs laissez vn venin dans le cœur du regret qu'ils ont de leurs villes perduës, & vn moyen tres facile de leur en venger: La Rochelle, Montauban, & plusieurs autres places leurs demeurent entre mains, car la Rochelle seule est capable de recevoir deux armées par Mer & par Terre, & de-là, ruyner & rauager tout vostre Royaume: N'auons-nous pas veu comme leur

armée Nauale à pillé tous vos costes, & estoient maistres de voz Mers, iusques à ce que Monsieur de Guise leur aye liuré bataille, & qui en effect les eust tous coulez à fōds, & si les autres Capitaines eussent voulu aussi bien attaquer que luy, & Monsieur de S. Luc; car l'un des Capitaines mesme m'a raconté que si chaque Nauire de vostre armée eust voulu aborder vn Rochelois, ils les eussent tous ruiuez, mais les Normands, Malloüins & autres, craignoient de perdre leurs Nauires, & puis n'en estre recompensez, à cause que les Commissaires & Tresoriers vous ont grâdemement volé, qui est la cause que si refaites vne armée Nauale, il faut que achetiez les vaisseaux & les Canons, & que en donniez les Capitaineries à des hommes de qualité mediocre, qui n'ayent que l'honneur & vostre seruice en recommandation leur faisant prendre de bons Pilottes sous eux, avec la moitié des Marhelots & de Soldats, vous verrez qu'ils feront des merueilles. Beaucoup vous diront que les Gentils-hommes ny Soldats François n'entendent rien à la Mer, & n'y sont pro-

pres, il est vray qu'ils ne sont pas Pilottes, mais ils se battent bien mieux & au besoin sont bien plus courageux & resolu : L'exemple en est toute ressentie, car sans la ferme resolution de Monsieur de Guise, & la Noblesse & Soldats qu'il auoit, ses Pilottes ne vouloient virer sur les Rochelois, & par ainsi vostre armée Nauale eust esté perduë, à ceste heure l'on vous obieçtera que l'entretien d'une armée Nauale est trop grand, & que n'y pourrez fournir, le remede est que lors que aurés trente bons vaisseaux à vous, il faut cottiser chaque Haure, & chaque ville dix lieues prés desdits Haures, à les entretenir, d'autant que c'est leur richesse & seureté, tant contre les Turcs, Rochelois & autres corce-res, ou bien faut mettre vn impost sur les vins qui sortent, tant de la Riuere du Rof-ne, de la Garonne, du Loir, que de la Cene: Je m'asseure qu'il n'y a bon François qu'il n'en soit tres-content, car les Italiens, Flamans & Allemans en sortent la plus grande partie, & par ce moyen vous ruinez la Rochelle & aurez le traffic libre aux Mollucques & terres lointaines, com-

me les autres Princes qui en tirent tres-
grand profit. Et pour vne armée par terre
qui ne vous coustera rien, il faut que cha-
que Parroisse de vostre Royaume vous
donne & entretienne vn soldat d'Infante-
rie, & qu'en chaque Euesché s'eslise vn
Capitaine par vne assemblee des trois E-
stats dudit Euesché, qui aura le soin de fai-
re payer les soldats par lesdites Parroisses,
& les vous meneront sous des maistres de
Camp qu'establirez par les Prouinces de
vostre Royaume, & ne faudroit nulle-
ment que ses voleurs Tresoriers ny Com-
missaires receurent les deniers des Fer-
miers desdictes impositions pour l'Armee
Nauale, ny ceux des Parroisses pour l'Ar-
mee de Terre, car ils vous volent & voz
Capitaines & soldats, il faut que les Fer-
miers & Parroissiens payēt aux Generaux
d'armee ce que vostre Majesté leur ordō-
nera, & à chaque Maistre de Camp, Capi-
taines & autres officiers de mesme, & que
si vn seul d'eux manquent d'auoir le nom-
bre d'hōmes & vituailles soit par Mer ou
par Terre ce qu'aurez commandé, qu'ils
ayent la teste tranchee sans remission, au-

trement ilz vous desroberont tousiours
 comme ils ont faict: l'ay veu & ouï dire
 à voz Capitaines de Mer & de Terre, que
 voz Tresoriers & Commissaires traittent
 avec eux, en tirant le plus qu'ils peuvent
 pour auoir l'argent de leurs payes & de
 leurs soldats, & vous font à croire qu'avez
 des quinze & vingt mil hommes, & il n'y
 en a pas la moitié, car c'est chose que l'ay
 veüe en tous voz voyages, & encores au
 dernier, là où les Commissaires des viures
 laissoient les soldats trois iours sans leur
 bailler vn morceau de pain, & ce qui leurs
 en bailloient estoit si mauuais, que les
 soldats se mouroient faute de nourriture,
 le Preuost-vous en pourra dire des nou-
 uelles, car il a veu mourir par les chemins
 des soldats faute d'estre nourris: vous sça-
 uiez ce qu'il vous en dit lors que luy com-
 mendaistes de demeurer derriere l'armee,
 pour faire pèdre les soldats qui s'en iroiēt,
 mais au lieu des soldats, il falloit faire pen-
 dre lesdits Commissaires des viures, & deux
 ou trois Tresoriers, & trancher la teste à
 deux ou trois Capitaines de ceux qui s'ac-
 cordent avec eux, d'auoir deux cēs hom-
 mes

mes dans leurs compagnies, & n'en ont pas
 fix-vingts : car vous ne manquez de sol-
 dats qu'à faute de les bien payer, & bailler
 de bon pain d'amonition : & ce sont vos
 Capitaines & Tresoriers qui ont vostre ar-
 gent, & vous font recevoir des affronts
 immortels faute d'hommes, comme d'a-
 voir quitté Montauban & la Rochelle,
 manque de soldats & d'argent pour les af-
 famer. Si vous faisiez rendre compte à
 ces volleurs de Tresoriers & Commissai-
 res, vous seriez L O V Y S L E I V S T E, &
 trouueriez de l'argent assez pour l'entre-
 tien de vos armées, & recompenser tant
 de pauvres soldats qui ont eu les bras &
 jambes cassés & rompus en vous servant.
 Ce sont les Tresoriers qui causent tant de
 mécontents qui sont dans vostre Royau-
 me, à cause qu'ils ne payent que la moitié
 des pensions des payes des gens de guer-
 re, à ceux à qui les avez donnez, & retien-
 nent l'autre moitié pour eux : & apres qu'ils
 sont riches à vos dépens, ils ne songent
 qu'à donner des cent mil pistolles à leurs
 filles en mariage, faire des bastimens su-
 perbe, courir leurs femmes de pierreries

auoir tres-beaux meubles , vaissellës d'argent , & estre plus braues, mieùx couuerts que les Princes , auoir carrosses & grands cheuaux, acquerir de grandes terres, & des estats de Presidēt, ou Maistres des Requestes à leurs enfans, pour encore mieùx voler vostre Majesté, & vostre pauvre peuple: car si vous le souffrez vous aurés nō Louis le simple, & serez dépoüillé du plus beau & du meilleur de vostre Royaume , si n'y prenez garde promptement. Pour ce qui est de vostre Royaume , si voulez regner, & que Dieu vous conserue , il faut auoir principalement soin à ce qu'il y soit loüé & seruy pieusemēt & dignement par gens deuots, & viuans sainctement comme bōs Prestres, bōs Religieux & Religieuses, & non par des Cardinaux, Euesques, Religieux, & Religieuses , vicieux & dissolus d'actions & de paroles, comme la France en est remplie. Et qui est la cause de tant d'heresies qui se font tous les iours dans icelle, d'autant que leur mauuais exemple perd & détourne les bonnes ames. Il faudroit qu'ils se souuinssent de la Parole de nostre Seigneur à ses Apostres Vous estes

la lumiere du mōde: & quand S. François
 le pria de luy faire sçauoir s'il le vouloit
 faire Prestre, il luy enuoya vne bouteille
 le pleine d'eau de fontaine par vn Ange,
 qui luy dit: François, il faut estre net & clair
 comme cette eau pour estre Prestre. Que
 ne prennent-ils exemple sur vn S. Charles
 Boromee, & autres qui ont vescu pieuse-
 ment, & ont eu soin de faire bien viure les
 Prestres & Religieux de leur Diocese. Quel-
 le honte est-ce de voir la vie des Prelats,
 Abbez, Abbeses, Prieurs, Cordeliers, Cu-
 rez, Religieux, & Religieuses de ce Royau-
 me: vous endurez qu'ils ayēt leurs propres
 belles sœurs pour concubines ordinaires.
 Vous leur voyez des meutes de chiens,
 cheuaux, Gentils-hommes, Escuyers, Pa-
 ges, Laquais, & autres gens inutiles à leur
 vacation: comme des seculiers addonnez
 à tous vices: ils ne hantent que les bordels,
 le berlan, le petit More, & autres cabarets,
 Les Abbeses & Religieuses jettent le froc
 aux orties dix ans apres leur profession: ce
 sont des somptuositez nō pareilles, il ne
 leur faut que des parfums, des lits & ta-
 piseries de mil pistolles, vne Musique de

chançons mondaines , avec des carrosses magnifiques pour mener des Dames à des collations dans les jardins , ou dans leurs maisons. Ils ne vont dans leurs Eueschez que pour amasser injustement de l'argent, & les Curez en leurs Parroisses qu'une fois en dix ans. Si vous voyez & sçauiez, sans cōparaïson, cōme moy, la façon qu'ils vivent aux champs, vous en auriez horreur; & ne vous estonneriez s'il y a tant de Huguenots en vostre Royaume : car ie sçay vingt Parroisses de Catholiques, ou il n'y a pas deux cens hommes qui sçachent leur Credo. Il n'y a gueres d'Euesques qui facent la visite. Leur Archidiacre pour auoir de l'argent à despandre en vanitez; festins, luxures, jeux, & somptuositez, ferment les yeux à toutes les fautes des Prestres. Les Curez sont des Chanoines qui ne bougent des villes à viure oisïuement, & n'ont que des ignorans Vicaires, qui ne font que prendre sur le peuple, & ne l'instruisent en façon du monde, n'y chantent ny Messe ni Matines que par maniere d'acquit. Et les Cordeliers, qui vont prescher tous seuls dans les parroisses, font tant de

desordres dans les parroisses , qu'on est
 contraint de les chasser de la chaire. Quel-
 le pitié est-ce? Quelle honte est-ce de voir
 rompre des mariages sans subject long
 temps apres auoir esté consommiez, & de-
 meurez ensemble? Le de Brissac
 & le Comte de Candales estoient ils im-
 puissants , punais ou ladres pour les pou-
 uoir démarier comme ils ont esté? N'a-ce
 pas esté vne grande honte de voir enleuer
 des femmes mariees d'auéc leurs maris, &
 les tenir dans des Chasteaux deux ou trois
 ans pour en jouir à son plaisir, comme a
 fait le Marquis de Rosny. Pour remedier
 au deffaut des Ecclesiastiques , il faudroit
 les reformer tout à fait : les Religieux ou
 Religieuses, & que vostre Majesté cōtrai-
 gnist chaque Euesque de demeurer en son
 Euesché, faire les visites souuent ; & que
 chaque Euesque n'auroit que son Eues-
 ché, chaque Abbé que son Abbaye , ny
 chacun Prieur ou Curé , que chacun sa
 Prieuré ou Cure , & y demeurassent d'or-
 dinaire pour faire le seruice deuotieuse-
 ment, & instruire le pauvre peuple à pieté,
 & des poincts de la Foy Catholique: & les

Chanoines se contentassent de leurs Prebendes. Ils me respondront, qu'un benefice seul n'est pas capable de les nourrir & entretenir selon leur qualité, attendu les grâdes despenses que l'on fait aujourd'huy en France. Puis il faut que vostre Majesté commence par elle mesme à reformer tant de choses inutiles en vostre maison; comme tant de Veneurs & de chiens, pour le Cerf, pour le Cheureul, pour le Loup, pour le Lièvre, pour le Sanglier, tant de violons, tant de Musiciens: à quoy sert tout cela, puis que vostre inclination n'y est pas portée? Que voulez vous faire d'une grande Escurie avec tant d'Escuyers, de Pages, de chevaux que l'on ne voit iamais: que si vous aimez encore la tirerie & vannerie, il faut avoir des oyseaux et des arquebuses: que vous servent tant de valets de pied, tant d'officiers de cuisine, de pannetier, d'eschançonnerie, de goblets, tant d'autre sorte de domestiques, à quoy est bon tout cela? Quelque esprit réply de vanité vous viendra dire que c'est la grandeur d'un Roy d'avoir une grande Maison. Voyez si pas un de tous les Monarques, Empereurs, Rois,

Princes attachent leur grandeur à cela, au contraire, s'en moquent: car la grandeur & la force d'un Roy se void à auoir force Soldats dans les garnisons & à la campagne, bien payez, force canons pour se faire craindre à ses ennemis & voisins: trente Nauires de guerre de quatre cents tonneaux le moindre, avec vos Galleres. Voyez l'armee Naualle du Roy d'Angleterre, du Roy d'Espagne, & des Estats, qui porte près de mil canons de fonte verte dans ses Nauires, & toutes ses Garnisons es fortes places bien munies de canons de batterie, & de Soldats bien payez & bien couuerts. Enquerez-vous de l'Arsenac de Venise, il y a trois mil trois cens canons, & trois cens cinquante Galleres & Galliacs, de quoi armer soixante mil hommes de pied & dix mil cheuaux, avec tant d'or & d'argent dans leurs tresors: qu'un chacun les redoute: & s'ils auoient la moitié d'autant d'hommes que vous en auez, ils se rendroient maistres de la Chrestienté; car ils ne sont vestus que simplement, ils n'ont nulle vanité ny folle dépense dans l'esprit comme les François. Il vaudroit mieux

employer vostre Noblesse & vostre argēt
 aux actions genereuses , que non pas à
 nourrir tant de chiens, d'oiseaux, grands
 cheuaux, & autres qui ne vous seruent de
 rien; ie m'asseure que Monsieur le Prince
 qui est grand Veneur, & tous vos Lieute-
 nans, & autres Centils-hommes qui sont
 de vos Veneries, & vos domestiques mes-
 mes, aimeroient beaucoup mieux estre
 employez à la conduite des gens de guer-
 re, & aux charges honorables, que d'estre
 tous les iours à courir parmy les bois, ny
 acquerir point d'honneur; Quand vous &
 eux auriez pris tout ce qu'il y a de bestes &
 d'oiseaux au monde, il n'en seroit pas par-
 lé à trois lieuës de vous, là où des batailles
 qu'auriez gagnes, & des villes emportees,
 les reduisant en vostre obeïssance, il en se-
 roit memoire, & parlé tant que le monde
 sera monde. Pour vous deliurer encores
 d'un autre argēt qu'employez inutilemēt,
 & qui vous nuit plus qu'il ne vous sert; c'est
 celuy que vous ballés pour les Forts, Cita-
 delles & Garnisōs du dedās vostre Royau-
 me, & des places maritimes là où il n'y,
 point de Havre, il faudroit razer tout cela

& ne laisser que les places frontieres bien fortifiées, & bien garnies de bon canons & bons hommes bien payez; comme sont les Garnisons de Câbray, d'Arras, Millan & autres bonnes places qui sont au Roy d'Espagne. Vous voyez que s'il n'y eust point eu de places fortes au dedans de vostre Royaume, les Huguenots ne vous eussent tant donné de peine, ny n'y eust eu ny n'y auroit jamais de ligue, ny de guerres civiles: car les mécontés, soit Princes ou autres, ne se sçauroient r'allier si loin, & principalement quand vous auriez forces belles troupes entretenues, avec force beaux Nauirés, & force canons dans les Prouinces, les estrangers ne songeroient pas seulement à entreprendre sur vous. Et sur tout ne baillez jamais vos places fortes à de grands Princes & de grands Seigneurs; bien la conduite de vos armées de Mer & de Terre, pourueu que soyez bien assuré que les Marechaux de Camp, Maistres de Camp, Vice-Amiral, Capitaines & autres Officiers ne vous quitteront pas pour les seruir, si d'aduanture, comme il arrive souuent, lesdits Princes ou Generaux d'Ar-

mée deuiennent mécontents. Pour ce qui est des Parlemens & Bailliages Royaux, & autres Iustices de la Frâce, c'est là ou est le grand mal de vostre Royaume, la perte totale de vostre Estat; car de Iustice il n'y en a point du tout, ce ne sont que volleries & pilleries, qu'il est impossible d'en mettre la centiesme partie par escript: seulement ie vous diray & feray voir qu'ils sont les Roys de la France, & non-pas vous: car ils ont pris des authoritez, & font des superbitiez à quoy ne voudriez penser. Il ne faut point esperer de Iustice d'eux, que ceux qui leur bailleront le plus de pistoilles pour piaffer eux & leurs femmes. Si vous estes leur voisin, assurement vous estes ruiné, si ne leur baillez voz terres à tel prix qu'ils les voudront auoir, ou si ne leur laissez prendre toutes les preéminēces de la Parroisse, ou si les empeschez d'estendre leurs terres & fiefs tant qu'ils voudront; ou si mettez vn de leurs valets ou fermiers en procez, vous estes perdus, il n'y aura sorte de trahison ny de meschâceté qu'ils ne vous intentent. Demandez à Marseille s'il ne luy a pas cousté dix mil escus pour auoir baillé

vn soufflet au President Cheuallier? & i'ay
 veu pendre vn soldat pour auoir dit à vn
 President en sortant du Palais, Vous m'a-
 uiez promis de me faire gagner mon pro-
 cez, mais ie l'ay perdu: ledit President r'ē-
 tra au Palais, il fit accroire que le Soldat
 l'auoit voulu tuer, & le fit condamner à
 mort, & le fit pendre tout à l'heure: De-
 quoy le feu Roy vostre pere en fut en si
 grād' cholere, qu'il fallust que tout le Par-
 lement en corps allast luy en demander
 pardon dans les Tuilleries. Y a-il rien au
 monde plus glorieux & si insupportable
 cōme ceux du parlemēt d'Aix? I'ay veu des
 Seigneurs de trente & quarante mil liures
 de rente en aller voir, qui ne faisoient non
 plus d'estat d'eux que de crocheteurs, &
 neantmoins il falloit encores leur bailler
 des mille pistolles pour auoir Iustice. A
 Bordeaux c'est encore pis: Car i'ay veu
 des Marchands & Habitans ne pouuoir ia-
 mais faire rapporter ne Iuger vn procez
 qu'ils y auoient avec vn Conseiller, & les
 contraignit d'en accorder à sa volonté.
 I'ay oüy dire à vn Gentil-homme Breton,
 qui est de voz Cheuaux Legers, qui estoit

prisonnier à la Cōciergerie, qu'il auoit esté
 condamné à Rennes d'auoir la teste tran-
 chée, pour auoir abbatu le chappeau d'un
 Conseiller ; & que ce mesme Conseiller a
 fait donner par ses laquais à vn autre Gen-
 til-homme cent coups de baston sans sub-
 ject : duquel Gentil homme lesdits Par-
 lements n'ont pas seulement voulu rece-
 uoir la plainte. Il me conta aussi d'un autre
 Conseiller au mesme Parlement , lequel
 à cause de sa belle mere qui est de Rennes,
 auoit esté executé pour certains deniers
 de vostre Majesté qui auoient esté esgallez
 sur la ville, il enuoya querir l'Escheuin qui
 l'auoit fait executer, & luy fit dōner deux
 cents coups de baston à son logis ; & la
 Cour de Parlement ne fit que s'en moc-
 quer , quand l'Escheuin & le corps de la
 Ville leur presenta sa requeste & plainte,
 disant & voulant estre respectee & redou-
 tee plus que vostre Majesté mesme. Et
 veulent en tous les Parlements , que tou-
 tes les affaires des Prouinces , tant pour la
 guerre, que pour autre chose, se gouuer-
 nent directement par leur volonte. Aussi
 voyez-vous qu'en toutes les grandes villes

& petites, ce sont les Iusticiers qui sont les Capitaines, donnent le mot, font les gardes & les rondes, ou les font faire par leurs Clercs, qui n'y entendēt non-plus qu'eux, ont les clefs, sont Maires des villes : & si c'est en pays d'Estats, c'est tousiours l'un d'eux qui est Deputé de chaque ville, d'autant que pas vn des habitans ne les oseroit contredire. Le Marquis d'Asserac qui est de grande maison, disoit à vn mien amy il y a quelque temps, que pour auoir dit à vn Conseiller, que s'il estoit son Rapporteur, malgré luy il le croiroit estre son ennemy, le Parlement de Bretagne decreta contreluy, & l'enuoya prendre dans son liēt ou il estoit malade, & commanderent aux Huissiers de le trainer par les ruës en le menant dans les cachots, & ne luy permettre d'y aller en carrosse: & luy eussent fait trancher la teste, s'il n'eust esté proche allié de Monsieur le Chancelier, qui luy enuoya vne euocation en toute diligēce. Leurs femmes par tous les Parlements passent deuant quelque Dame que ce soit, & eux en toutes assemblées, soit de festins, accords, bals, & autres lieux, prennent tous-

jours la place d'honneur. Et que vostre
 Majesté ne s'estonne pas s'il y a tant de
 mescontens , tant des Ecclesiastiques,
 Gentils-hommes que Soldats & habitans:
 car ils ont si grand desir de se venger de
 leurs iniquitez , & des voleries des Tresor-
 riers, ils seruiroient plustost le Turc, qu'ils
 ne s'en vengeassent tost ou tard. Ils font
 les bons valets auprez de vostre Majesté,
 & disent qu'ils font le maintien de vostre
 Couronne; mais neantmoins si n'eussiez
 eu la victoire des ponts de Sé, ils se reuol-
 toient tous à cause de la Paulette , & y
 poussioient le plus de Gentils-hommes
 qu'ils pouuoient. N'a-ce pas esté eux qui
 ont fait & maintenu cette grãde Ligue qui
 dura si long-temps contre le feu Roy vo-
 stre Pere? Comment est-il possible que de
 leurs gages & espices ils peussent s'entrete-
 nir eux & leurs femmes si somptueuse-
 ment? Car j'ay veu vne Presidente porter
 des rabats de cent pistolles , & des chemi-
 ses toutes bandées de poinct-couppé de-
 puis le hault jusques en bas, plus plein que
 vuide, & de la plus belle dentelle de Flan-
 dres tout à l'entour , les cottillons tous

couuertz de clinquant , robbes de velours
 couuertes de boutons de pierreries , filets
 de perles de cent francs la piece , pendans
 d'oreilles & bagues à l'équipolent , avec
 le Carrosse de velours cramoisi , & des
 cheuaux gris comme si c'estoit vne Prin-
 cesse de cent mille escus de rente; ils bastif-
 sent aux champs & à la ville, acheptent de
 belles terres, auacent leurs enfans, & ont
 de grandes richesses en meubles: Vous
 voyez de petits Aduocasseaux, qui depuis
 dix ans sont deuenus des Millortz , parce
 qu'ilz ont vn escu par heure de cōsultation
 & cinquante escus , voire cent pistolles,
 pour plaidervne cause, ou faire vn escrit de
 trois fueillets de papier, au lieu qu'ilz ne
 deuroient auoir que cinq sols par heure
 de consultation, & vn escu pour plaidoyé,
 encores seroient-ils trop riches. Pour re-
 medier à cela, il faudroit que vostre Ma-
 jesté les fist contenter de leurs gages sans
 prendre espices ny presens, à peine de la
 vie, les soulageant aussi de tant de des-
 pence qu'ilz font eux & leurs femmes, par
 vne deffence faite exprez à peine de la vie,
 de ne porter iamais soye, pierreries ne clin-

quant, ne auoir carrosses, tapissieries de Flandres, ne vaisselle d'argent ny d'or: car il sort tous les ans plus d'un million de vostre Royaume, tant en dentelles, de point coupé, que cheuaux de carosse, qui apportent vne grande ruine, & de grande dépence; & mieux seroit & plus commode pour des vieilles personnes, d'auoir des chaires portantes à la mode d'Italie, cela ne cousteroit presque rien, & neantmoins il y seroit employé force personnes qui se mettent à voler faute de trouuer moyen de gagner leur vie. Encôres pour mieux faire il faudroit casier tous les Parlemens, toutes Iurisdicions, bares Royales qu'autres, & à chaque Euesché eslire par vne assemblee de trois ans en trois ans des trois Estats dudit Euesché, six arbitres, deux de l'Eglise, deux de la Noblesse, & deux du tiers Estat, dans lesquels six arbitres tous les differends tant ciuils que criminels, se rapporteroient par des Aduocats, tant de parole que d'escrit en presence de leurs parties, puis les arbitres les feroient retirer, & iugeroient definitiuelement sur le champ, & qu'il n'y eust plus long

long terme que trois sepmaines pour appeller depuis la premiere assignation iusques au iugement. Pendant lesquelles trois sepmaines le demandeur feroit appeller sa partie par exploict donné en presence de tous les Parroissiens par trois Dimanches, & si le deffendeur est absent du pays, les arbitres luy dōneront autrés trois sepmaines, & si c'est vn Gentil-homme ou Soldat qui seroit veritablement dans voz Armées, il faudra luy donner six mois de terme, & faudroit que les arbitres n'eussent que les gaiges qu'il plairoit à vostre Majesté leur dōner, encore ie croy que les Prouinces seroient fort aysees de se cottiſer & les payer pluſtoſt que demeurer ſoubs la tyrannie des Iuges d'apresent, & ainſi faiſant vous maintiendrez le trafficq des Marchands & des Payſants qui ſe perdent tout aujourd'huy en procez, & quād vous auriez affaire d'eux, ils auroient de l'argent pour aller aux Armées, ou aujour-d'huy ils n'ont ſeulement de quoy viure, tant ils ſont ruynez de chiquanneries & longueurs de procez, & tous les Marchāds mettent tous leurs enfans au Palais pour

les faire riches, & quitter le trafic qui est vne grande perte à vostre Royaume. Quand vn Prince ou Seigneur prie les Gentil-hommes de l'accompagner dans l'vne de voz armées, son excuse est qu'il a vn procez sur le bureau, & qu'il n'a pas mille pistolles pour ce faire faire des habits couuerts de clinquants, broderies & passemens. Je ne parle du Parlement de Roüen car i'en suis du pays: il y auroit tant de meschancetez à escrire, que cela seroit trop long. Pour ce qui est des Princes & Gentil-hommes, (Croyez la parole de Dieu qui dit, ne vous fiez point aux Princes (car ils voudroïent bien estre tous Roys, Ducs ou Comtes de voz Prouinces : Il faut qu'ils viuent sagemēt, & s'ils se battent en dueil ou commettent quelques actions violentes enuers qui que ce soit, ils ayent la teste tranchée & leurs biēs confisquez, & si c'est pour dueil, leurs enfans declarez roturiers, car autrement si ne les tenez en subiection par de bons Preuosts, ils succederoient à l'orgueil & impudence des Tresoriers. Sur tout, ne baillez iamais de places fortes à des Princes ny à des grands

Seigneurs, ny de troupes qui soient à eux, ny ne donnez iamais rien à vn Gentilhomme par l'intercession du Prince, car c'est au Prince à qui il en a l'obligation, mais soyez curieux de sçauoir ceux qui vous peuuent seruir, & qui vous ont seruy en chaque Prouince, & les employez & cherissez, caa s'ils ont l'esprit ambitieux & de courage, ils seruiron les mescontens plustost que de n'estre employez: & quand vous aurez des volōtaires dans voz armées que l'on leur donne des Capitaines à chaque trauail, & qu'ils entrent en Garde, & donneront aux occasions au rend que les Mareschaux de Camp leur donneront, s'il y en eust eu tousiours à Montauban, & à Montpellier, voz Regiments n'eussent pas esté massacrez cōme ils ont esté: Et pour le payement de voz troupes, voyez vous mesme faire les Monstres, & faictes trancher la teste aux capitaines qui auront mis des Passeuolants, & aux Armées où ne serez pas, ayez-y des espions: pour vous rapporter le nombre d'hommes que vous y payé y est tout entier, & plustost i'y enuoyerois des bons Capucins ou autres bōs

Religieux qui mesprisent l'argent, afin de n'y estre trôpé, & ce qu'auriez d'hommes fussent bien payez, car vn General d'Armée, & Marechal de Cāp ne vous dira ny n'amendera la verité, d'autant qu'ils ne veulent desobliger Maistres de Camp, Capitaines ny Tresoriers, d'autant qu'ils craignent en auoir affaire vn iour, en cas qu'ils vinssent estre mescontens, & veulent tousiours faire le plus d'amis qu'ils pourront, pour en estre seruis en cas de mouuemens, ou guerres Ciuiles: & sur toutes choses, deffendez encor plustost durant la guerre que durant la paix, les clinquants, broderies & tous passemens dentelez & poinct couppe, & deffendre tous carosses, piereries, vaiselles d'argent, Pages & Gentils-hommes suiuians, si ce n'est aux princes ou Officiers de la Couronne, ausquels il n'en faut que deux ou trois, car vostre Noblesse & voz soldats employēt tout leur argent à estre braues, & auoir grand equipage, & dans peu de temps ils meurent de faim, & sont cōraincts de quitter vos armes, la où quand les empescheriez par vos Edicts de toutes ses vanitez & folles despences, ils

auront tousiours de l'argent, & seront des
annees toutes entieres dans les Armées de
vostre Majesté, & ne serez point que n'aiez
force Soldats, & cinq cens volontaires au-
prez de vous, où ie vous ay veu plus de
vingt fois quen'en aiez pas trente. Pour-
ce qui est des Marchands, Habitans, & gēs
du tiers Estat, il faut qu'ils ne se meslent
que de leur traffic, & non de la plume ny
de l'espée, si ce n'est pour garder leur ville,
ny qu'eux ny leurs femmes ne portent ny
foyes, ny pierreries, ny dentelles, non-plus
que ceux de la Iustice, & les Païsants de
bonne toille toute simple: ainsi faisant dās
peu de temps ils seront tous riches, & vous
pourront servir toute leur vie chacun en
sa vacarion sans s'incōmoder nullement:
& vn poinct qui est aussi notable, que pas
vn, c'est que les Iuges n'entrent nullemēt
dans les maisons de Ville, ny ne soient Ca-
pitaines des villes, ny ne se meslent que de
leur mestier; car autrement dans peu de
temps ils vous feront voir qu'ils possèdent
la France à leurs volonte. Et afin que les
Ecclesiastiques, Gentil-hommes & Tre-
soriers n'ayent aucun suiets de voler & de

prendre voz deniers, osté la venalité des Offices & des charges, car ils disent tout haut qu'ils ne peuuent acheter des Charges ny Offices si cheres, s'entretenir eux leurs femmes & leurs enfans si somptueusement, sans prendre de vos deniers, & de vostre pauvre peuple. Croyez, SIRE, que si vous faictes la presente renocation, vous ne perdrez iamais ce nom de LOVYS LE IUSTE, & serez le plus puissant qui se puisse voir: car DIEV sera bien seruy, la Iustice sera bonne, vostre infanterie sera pleine de Gentils-hommes, voz Marchands feront grand trafic, & voz paisants seront riches, pour nourrir vos armées quand elles passeront, & vn chacun de toutes les vacatiōs susdites, on priera Dieu de meilleur cœur pour vostre prosperité en ce monde: mais sur tout il faut que vostre Majesté, & voz Princes & Princesses, soyez les premiers à monstrier l'exemple de ceste Reformatiō, & non pas de la rompre, comme fistes l'Edict de porter du clinquant l'année passée.

F I N.







